

Sumáriu Kazu
Tribunál Judisiál Primeira Instáncia Díli
Dezembu 2024

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.
JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instáncia Díli.

1. Totál kazu ne'ebé JSMP monitoriza: 11

Artigu	Tipu Kazu	Númeru
Artigu 145 Kódigu Penál (KP) & artigu 2, 3, 35 no 36 Lei Kontra Violénsia Doméstika (LKVD)	Ofensa ba integridade física simples ho natureza Violénsia Doméstika (VD) no tipu ilísitu sira kona-ba violénsia doméstika	3
Artigu 154 KP & artigu 2, 3 (a) no 35 (a) LKVD	Maus-tratus ba kónjuje	2
Artigu KP 171 KP Artigu KP 181 nú 1	Koasaun seksuál Ezibisionizmu seksuál	1
Artigu 177 KP ho Artigu 182-Agravasaun	Abuzu seksuál ba menór ho agravasaun	1
Artigu KP 151 KP-	Ofensa korporál resíproka	1
Artigu KP 172 ho Artigu KP 173 Artigu KP `182/1 Artigu KP 171.	Koasaun seksuál, violasaun seksuál ho agravasaun	1
Artigu 161 KP	Raptu	
Artigu KP 332 Nú. 1 KP	Explorasaun ba jogu ilísitu	1
Artigu 297 KP, artigu 299 KP no artigu 274 KP	Abuza podér, partisipasaun ekonómika no administrasaun danoza	1
Totál		11

2. Totál desizaun ne'ebé JSMP monitoriza: 8

Tipu desizaun	Artigu	Númeru
Multa	67 KP	4
Suspensaun ba prizaun nia ezekusaun no indemnizasaun sivíl	68 KP no 69(a) KP	1
Absolve		3
Totál		8

3. Totál kazu sira ne'ebé sei kontinua prosesu tuir JSMP nia monitorizasaun: 3

B. Deskrisaun sumáriu julgamentu ba desizaun kazu sira

1. Krime maus-trautus ba kónjuje

Nú. Prosesu	: 0020/22 DICMR
Kompozisaun Tribunál	: Koletivu
Juis	: Dr. José Gonçalves, Dra. Ersilia de Jesus no Dr. Jose Qintão
Prokurador	: Dr. Luis Hernani Rangel
Defensor	: Dr. Manuel Exposto
Asistente ba ofendida	: Dra. Adelina Lobo (Advogada Privada)
Desizaun	: Pena prizaun tinan 3 suspende ba tinan 4 no indemnizasaun sivil US\$500.00

Iha 3 Dezembru 2024, Tribunál Judisiál Primeirá Instánsia Dili, prezide leitura akordaun ba krime maus-trautus ba kónjuje ne'ebé envolve arguidu JdJP hasoru nia feen, iha Munisípiu Dili.

Akuzasaun Prokuradór

Prokuradór akuza katak iha 9 Janeiru 2022, iha oras ne'ebé la apura, maibé iha kalan, arguidu buti no rasta ofendida nia liman ba kuartu laran, hodi tuku dala ida iha ofendida nia ulun no tuku dala ida iha ofendida nia matan okos parte karuk. Kazu ne'e akontese tanba antes ne'e arguidu ho ofendida iha ona problema.

Antes ne'e iha 17 Dezembru 2021, arguidu tuku dala sanulu iha ofendida nia ulun no tuku dala ida iha ofendida nia ibun parte okos, rezulta moras iha ofendida nia ulun, kanek no raan iha ofendida nia ibun. Arguidu mós tebe dala ida iha ofendida nia hirus-matan rezulta moras no bubu. Antes agresau ne'e, arguidu ho ofendida diskute malu kona-ba ofendida amante (*selingkuh*) ho mane seluk. Arguidu nia aktu ne'e rezulta ofendida triste, trauma no decide hela separa hosi arguidu.

Iha loron no fulan ne'ebé haluha ona, maibé iha tinan 2016, arguidu tebe dala ida iha ofendida nia hirus-matan rezulta moras no halo ofendida dada iis ladi'ak. Antes ne'e, arguidu ho ofendida diskute malu kona-ba ofendida amante (*selingkuh*) ho mane seluk.

Iha loron no fulan ne'ebé ofendida haluha, maibé iha tinan 2015, arguidu basa dala barak iha ofendida nia oin rezulta kanek no raan sai barak. Kazu ne'e akontese ho motivu ne'ebé hanesan ofendida iha relasaun amante (*selingkuh*) ho mane seluk.

Antes ne'e iha loron no fulan ne'ebé ofendida haluha ona, maibé iha tinan 2014, arguidu tuku dala barak iha ofendida nia isin. Arguidu nia aktu ne'e rezulta ofendifa sofre moras no halo ofendida oin halai. Kazu ne'e akontese ofendida amante (*selingkuh*) ho mane seluk.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 no konjuga ho artigu 2, 3(a) 35 (a) no 36 LKVD.

Produsaun ba prova sira

Iha prosesu julgamentu, arguidu deklara katak faktu balun iha akuzasaun prokuradór nian laloos. Purzemplu faktu ne'ebé akontese iha tinan 2014, la loos tanba la iha problema ruma akontese. Entretantu kona-ba faktu ne'ebé akontese iha tinan 2015, la'os arguidu mak baku ofendida maibé ofendida nia maun mak baku ofendida tanba ofendida públika ofendida nia foto la uza roupa iha fecebook. Arguidu deklara katak ofendida amante (*selingkuh*) ho ema nia la'en, nune'e ema nia feen reklama, arguidu ho ofendida nia família sempre tuur hamutuk hodi rezolve.

Arguidu mós deklara katak iha Dezembru 2021, arguidu tuku dala ida iha ofendida nia ulun no tuku dala ida iha ofendida nia matan okos rezulta kanek no raan, tanba iha altura ne'eba ofendida ho nia amante fila hosi serbisu lori malu ba iha parte Kristo Rei nian no ofendida ho kondisaun la uza roupa iha kareta laran. Iha akontesementu ne'e arguidu nia maun no nia bin mak haree rasik ho matan no halai tuir ofendida ho nia amante ho kareta ba iha dirasaun Kristu Rei nian.

Iha parte seluk ofendida konfirma faktu hotu iha akuzasaun no deklara katak sira hola malu desde tinan 2010, durate moris hamutuk arguidu sempre halo agrasaun fizika hasoru ofendida, nune'e ofendida deside hela separa ho arguidu tanba arguidu baku bebeik ofendida no halo ofendida triste no trauma.

Alegasaun finál

Prokuradór konsidera faktu hotu iha akuzasaun ne'e provadu hotu, bazeia ba konfirmasaun hosi ofendida, konfisaun parsial arguidu no relatóriu médiku hosi ospital. Prokuradór konsidera arguidu nia aktu ne'e grave no halo ofendida moris iha siklu violénsia no iha presau nia laran. Prokuradór haktuir katak mezmú ofendida nia aktu balu sai hanesan kauza maibé ne'e la'os razaun ba arguidu hodi prátika krime sira ne'e hasoru ofendida. Ho razaun sira ne'e husu ba tribunál atu kondena arguidu ho pena prizaun tinan rua suspende ba tinan rua fulan neen. Prokuradór mós husu ba tribunál atu kondena arguidu selu indemnizasaun sivil US500.00 ba ofendida.

Asistente Dra. Adelina iha nia alegasaun konsidera faktu hotu provadu, bazeia ba konfirmasaun ofendida nian, mezmú arguidu konfesa parsial katak

faktu ne'ebé akontese iha tinan 2021 no 2022 mak loos. Entretantu faktu sira ne'ebé akontese iha tinan 2014, 2015 no 2016 arguidu nega hotu, arguidu nia aktu ne'e halo ofendida trauma, ofendida loloos ne'e laiha hanoin atu keixa arguidu maibé tanba arguidu demais loos ona no ofendida la tahan ona ho arguidu nia aktu ne'e, nune'e ofendida deside hela separa ho arguidu. Mezmu iha tinan 2021 no 2022 ofendida hela separa ona hosi arguidu, maibé arguidu kontinua komete krime hasoru ofendida, ofendida konsidera arguidu nia aktu ne'e demais loos no nunka iha arremendementu, nune'e ofendida apresenta keixa. Depoisde hela separa hosi arguidu, arguidu nunka fó alimentasaun ba sira nia oan sira ne'ebé dadauk ne'e hela ho ofendida. Ho razaun sira ne'e, asistente husu ba tribunál atu aplika dever alimentasaun ba arguidu atu fó alimentasaun ba sira nia oan ne'ebé hela ho ofendida no konkorda ho alegasaun prokuradór nian no husu atu aplika pena asesoria atu arguidu la halo kontaktu fízika ka telefone ofendida esepu ba asuntu alimentasaun ba menór sira.

Entretantu defeza haktuir katak la duvida ho faktu sira, maibé arguidu pratika krime ne'e hasoru ofendida tanba iha motivu. Ema hotu-hotu iha liberdade maibé relasaun konjugal entre arguidu ho ofendida ne'e la'os livre absoluta. Defeza kontinua defende katak arguidu komete krime ne'e tanba laran moras no hirus kuandu nia feen amante bebeik ho mane seluk. Iha kazu ne'e arguidu ema ne'ebé fuan boot, pasensia tanba ne'e mezmu ofendida amante bebeik ho mane seluk arguidu sei ba konvida ofendida nia família sira hodi rezolve tuir família. Maibé bainhira ofendida kontinua hakarak separa ho arguidu iha dalan sivíl la'os kontinua moris hamutuk ho arguidu maibé iha kotuk amante (*selingkuh*) ho mane seluk.

Defeza haktuir katak dala ruma ida ne'e laos sai razaun ba arguidu atu pratika krime maibé ida ne'e mak motivu ba akontesementu ne'e. Tanba ne'e husu ba tribunál atu kondena arguidu ho pena prizaun suspende ninia ezekusaun. Entretantu kona-ba pedidu indemnizasaun sivíl hosi prokuradór, defeza la konkorda tanba ofendida ba halo tratamentu médiku iha ospitál nasional no la selu.

Desizaun

Depoisde avalia faktu hotu, tribunál konsidera katak faktu la provadu mak iha 2015, ne'ebé hatudu katak la'os arguidu mak baku ofendida maibé, ofendida nia maun mak baku ofendida. Nune'e mós tribunál lahetan prova katak iha 2021, arguidu tuku dala sanolu iha ofendida nia ulun, maibé arguidu tuku dala ida deit iha ofendida nia ulun no tuku dala ida iha ofendida nia matan okos rezulta kanek iha matan okos. Entretantu ba faktu sira seluk tribunál konsidera katak faktu sira ne'e provadu hotu.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan haat no kondena mós arguidu selu indemnizasaun sivíl US\$500.00 ba ofendida.

2. Krime explorasaun ba jogu ilísitu

Nú. Prosesu : 0077/24.PNSIC

Kompozisaun Tribunál : Singular
Juis : Dr. Jose A. de Jesus E. d. F
Prokuradór : Dr. Luis Hernani Rangel
Defeza : Dra. Agustina de Oliveira
Desizaun : Pena multa US\$45.00

Iha 9 Dezembru 2024, Tribunál Judisiál Primeira Instánsia Dili, prezide leitura sentensa ba krime explorasaun ba jogu ilísitu ne'ebé envolve arguidu ASM hasoru Estadu RDTL, iha Munisípiu Dili.

Akuzasaun Prokuradór

Prokuradór akuza katak iha 1 Abril 2024, arguidu loke joga bola guling/duir bola guling iha Sr. AdS nia uma durante loron rua la iha problema. Maibé iha kalan tuir fali mai polísia halo inspeksaun ba iha fatin refere hodi prende no halo kedas aprensasaun ba arguidu nia sasan sira ne'ebé maka arguidu uja hodi loke bola guling, tanba arguidu laiha lisensa hodi loke jogu bola guling.

Prokuradór akuza arguidu kontra artigu 322 KP kona-ba explorasaun ba jogu ilísitu ho moldura penál to'o tinan 3 ka multa.

Produsaun ba prova sira

Iha prosesu julgamentu, arguidu konfesa integralmente ba faktu hotu iha akuzasaun no deklarara katak foin primeiravés mai hatan iha tribunál, arrepende ninia hahalok no promete sei la repete tan hahalok hanesan iha futuro.

Alegasaun finál

Prokuradór konsidera arguidu provadu komete krime ne'ebé prokuradór akuza ba arguidu, foin primeiravés mai hatan iha tribunál, arrepende ninia hahalok no promete sei la repete tan hahalok hanesan iha futuro. Tanba ne'e atu prevene arguidu labele komete tan krimé hanesan iha futuro husu ba tribunál atu kondena arguidu ho pena multa.

Entretantu defeza husu bá tribunál atu kondena arguidu ho pena ne'ebé justu ho konsiderasaun katak arguidu konfesa, arrepende nia hahalok no promete sei la komete tan krime hanesan iha futuro.

Desizaun

Depoizde avalia faktu sira hotu tribunál prova katak, arguidu loke jogu bola guling no laiha karta lisensa.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, tribunál konklui prosesu ne'e no kondena arguidu ho pena multa US\$45.00, ne'ebé kada loron arguidu sei selu US\$1.00, durante loron 45. Tribunál mós fiksa pena alternativa durante loron 30 prizaun, bainhira arguidu la kumpri pena multa refere.

3. Krime abuzu seksuál ba menór ho agravasaun

Nú. Prosesu	: 0512/22,DICMR
Kompozisaun Tribunál	: Kolektivu
Juis	: Dr. Jose A. de Jesus Esquireal da Silva Faria, Dr. Afonso Carmona no Dra. Fransisca Cabral
Prokurador	: Dr. Pedro Baptista
Defeza	: Dr. Nelson Borges
Desizaun	: Absolve

Iha 9 Dezembru 2024, Tribunál Judisiál Primeira Instánsia Dili, prezide julgamentu leitura akordaun ba krime abuzu seksuál ba menór ho agravasaun ne'ebé envolve arguidu NdC hasoru subrinha GdF no TdFC, iha Munisípiu Dili.

Akuzasaun Prokuradór

Prokuradór akuza katak iha fulan no tinan ne'ebé haluha ona, bainhira ofendida GdF sei iha nivel primeiru ano, arguidu haruka ofendida tama ba uma laran susu arguidu nia orgaun sensitivu dala tolu no halo relasaun seksuál dala ida ho ofendida, tanba ta'uk ofendida la konta sai arguidu nia hahalok ne'e ba família.

Iha 23 Outubru 2022, iha oras tuku 10:30 dadeer, arguidu bolu ofendida TdFC tama ba uma laran, bainhira ofendida tama ba kuartu laran, arguidu taka odamatan no kontinua kolu ofendida nia saia, hafoin arguidu haruka ofendida susu arguidu nia orgaun sensitivu. Arguidu mós haruka ofendida toba iha semente leten hodi tafui kaben ba ofendida nia ibun laran, depoisde ne'e ofendida rona sinelus tarutu ofendida halai sai ba liur haree hetan ofendida nia inan ki'ik mak tama ba uma laran, nune'e ofendida konta sai problema ne'e ba ofendida nia inan ki'ik. Arguidu nia aktu ne'e rezulta TdFC sente trauma no moe ba família no viziñu sira. Ofendida GdF sofre kanek iha ninia orgaun sensitivu, trauma no moe ba família.

Prokuradór akuza arguidu kontra artigu 177 alinea (1) KP kona-ba abuzu seksuál ba menór ho moldura penál tinan 5 to'o tinan 20 no agrava ho artigu 182 KP.

Produsaun ba prova sira

Iha julgamentu, arguidu nega faktu hotu iha akuzasaun no deklarata katak nia nunka viola ofendida na'in rua. Arguidu hakfodak kuandu polísia sira ba kaptura arguidu iha nia uma. Arguidu mós deklarata katak antes ne'e família prepara ona akordu dame no haruka arguidu ho xefe aldeia asina, maibé arguidu la iha kuñesimentu kona-ba akordu dame ne'e. Arguidu mós deklarata katak durante ne'e nia kumpri prizaun preventiva tinan 1 fulan 3 iha prizaun. Arguidu mós deklarata antes ne'e sira la iha problema maibe hafoin sira hadau malu kioske tais nian iha Kolmera sira naran duun deit arguidu.

Alende ne'e, ofendida GdF iha nia deklarasaun deklarata katak, arguidu nunka viola ofendida, hanesan aman ki'ik arguidu dala ruma hirus no baku deit

ofendida kuandu lakohi toba no la estuda. Arguidu la halo hahalok sira hanesan iha akuzasaun hasoru ofendida.

Ofendida TdFC deklara katak arguidu la viola ofendida no la halo hahalok sira iha akuzasaun hasoru ofendida.

Testemuña MS hanesan ofendida nia inan depoimenta katak nu'udar negosiante sempre okupadu hela deit fa'an sasan no husik hela ofendida sira mesak iha uma ho nia tia. Kuandu fila uma ofendida sira sempre informa hela deit katak arguidu sempre baku ofendida sira kuandu la toba no la estuda. Kona-ba akordu dame ne'e testemuña rasik la hatene. Hanesan ofendida sira nia inan la hatene kona-ba akontesimentu ne'ebé akontese ba ofendida sira.

Testemuña EMS nu'udar ofendida sira nia inan ki'ik depoimenta katak la haree ho matan maibé ofendida GdF no TdFC konta ba testemuña katak arguidu haruka ofendida sira susu arguidu nia orgaun sensitivu.

Testemuña AdC arguidu nia alin hili direitu nonook tanba iha relasaun besik ho arguidu.

Alegasaun finál

Prokuradór konsidera arguidu provadu komete krime hasoru ofendida sira tuir deklarasaun testemuña EMS mezmu testemuña la haree ho matan maibé ofendida sira konta akontesimentu ne'ebé arguidu halo ba sira ba testemuña. Tanba ne'e prokuradór fiar ba depoimentu testemuña EMS, mezmu iha deklarasaun ofendida sira nian nega faktu hotu. Prokuradór mós deklara katak tanba julgamentu ba kazu ne'e atraju nune'e dala ruma halo ofendida sira la lembra ona. Ho razaun sira ne'e husu ba tribunál atu konsidera relatóriu PRADET nian no husu atu kondena arguidu tuir konviksaun tribunál nian.

Entretantu defeza iha nia alegasaun husu ba tribunál atu absolve arguidu hosi krime ne'e tanba laiha prova. Iha arguidu nia deklarasaun deklara katak la komete aktu sira iha akuzasaun hasoru ofendida sira, ofendida sira mós deklara katak arguidu la komete aktu sira iha akuzasaun hasoru ofendida sira, inklui testemuña MS mós la haree no la hatene kona-ba akontesimentu ne'e. Ho deklarasaun sira ne'e halo defeza duvida, tanba ne'e husu ba tribunál atu absolve arguidu hosi krime ne'e.

Desizaun

Depoisde avalia faktu hotu, tribunál konsidera faktu hotu la provadu, tanba tribunál duvida ba faktu sira ne'ebé prokuradór akuza hasoru arguidu tanba arguidu nega faktu hotu, ofendida sira mós deklara katak arguidu la komete aktu sira iha akuzasaun hasoru ofendida sira no testemuña MS ne'ebé ofendida sira nia inan mós la hatene no la haree akontesimentu ne'e.

Bazeia ba razaun sira ne'e hotu, halo tribunál duvida no absolve arguidu hosi krimé ne'e.

4. Krime ofensa korporál resíproka

Nú. Prosesu : 0653/23 DICMR
Kompozisaun Tribunál : Singular
Juisa : Dra. Ana Pula Fonseca
Prokuradór : Dr. Napolião Soares da Silva
Defeza : Dr. Marçal Mascarinhas
Desizaun : Absolve

Iha 13 Dezembru 2024, Tribunál Judisiál Primeira Instánsia Dili, prezide julgamentu tentativa konsiliaun ba krime ofensa korporál resíproka ne'ebé akontese entre arguida MDS hasoru nia la'en, iha Munisípiu Dili.

Akuzasaun Prokuadór

Prokuradór akuza katak iha 12 Setembru 2023, oras tuku 21:00 kalan, arguida rakut ofendidu nia kakorok, rakut mós ofendidu nia liman sikun parte karuk, arguida kontinua hasai liafuan mal ba ofendidu. Nune'e ofendidu mós tuku dala rua iha arguida nia reen-toos no lori fiu karega telefone nian hodi bobar ba arguida nia kakorok.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha produsaun ba prova tribunál halo alterasaun ba kualifikasaun jurídiku hosi artigu 145 KP kona-ba krime ofensa ba integridade fízika simples ho natureza violénsia doméstika ba fali artigu 151 KP kona-ba krime ofensa korporál resíproka tanba arguida ho ofendidu halo agresaun ba malu no kazu ne'e keixa kontra keixa.

Bazeia ba artigu 262 (1) KPP kona-ba tentativa ba konsiliaun, nune'e tribunál halo tentativa konsiliaun arguida ho ofendida husu deskulpa ba balu no promete atu la repete sira nia hahalok ne'e iha futuru.

Alegasaun finál

Prokuradór no defeza konkorda ho dezisténsia keixa hosi ofendidu no husu ba tribunál atu omologa pedidu dezisténsia keixa ne'e.

Dezisaun

Bazeia ba dezisténsia keixa hosi ofendidu no akordu dame hosi parte rua, tribunál konklui omologa dezisténsia keixa ne'e no absolve arguida hosi krime refere.

5. Krime ofensa ba integridade fízika simples ho natureza violénsia doméstika

Nú. Prosesu : 0845/23.DICMR
Kompozisaun Tribunál : Singulár
Juisa : Dra. Ana Pula Fonseca
Prokuradór : Dr. Napolião Soares da Silva
Defeza : Dr. Marçal Mascarinhas

Desizaun

: Pena multa US\$75.00

Iha 13 Dezembru 2024, Tribunál Judisiál Primeira Instánsia Dili, prezide julgamentu leitura sentensa ba krime ofensa ba integridade fizika simpes ho natureza VD ne'ebé envolve arguidu MF hasoru nia feen, iha Munisípiu Dili.

Akuzasaun Prokuradór

Prokuradór akuza katak iha 17 Novembru 2023, arguidu tebe dala ida iha ofendida nia kabas sorin karuk no tuku dala barak kona iha ofendida nia kabaas sorin karuk, rezulta ofendida sofre metan no moras iha kabaas sorin karuk. Arguidu mós hasai liafuan ne'ebé ladi'ak hasoru ofendida.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu hotu iha akuzasaun no deklara katak foin primeiravés mai hatan iha tribunál, arrepende ninia hahalok. Arguidu deklara mós katak hafoin akontesementu ne'e, depois fila hosi edifísiu polísia arguidu husu ona deskulpa ba ofendida no agora dadaun sira moris hamutuk nafatin hanesan feen ho la'en.

Alende ne'e ofendida kontinua konfirma faktu hotu iha akuzasaun no deklara katak di'ak malu ona ho arguidu no moris hamutuk nafatin hanesan feen ho la'en.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa no konjuga ho artigu 2, 3 (a), 35 (b) no 36 LKVD.

Alegasaun finál

Prokuradór konsidera arguidu provadu komete krime hasoru ofendida, bazeia ba konfisaun arguidu nian no konfirma mós hosi ofendida. Arguidu konfesa, arrepende nia hahalok no foin primeiravés mai mai hatan iha tribunál. Maibé atu halo prevensaun atu krime ne'e labele akontese tan iha futuru husu ba tribunál atu kondena arguidu ho pena multa.

Alende ne'e, defeza konkorda ho pedidiu hosi prokuradór, husu ba tribunál atu kondena arguidu ho pena multa tuir nesesidade arguidu nian.

Desizaun

Depoide avalia faktu sira hotu tribunál prova katak arguidu tebe dala ida iha ofendida nia kabaas parte karuk no tuku dala barak iha ofendida nia kabaas parte karuk. Tribunál mós konsidera katak hahalok arguidu nian ne'e rezulta ofendida sente moras, metan iha kabaas parte karuk. Arguidu mós hasai liafuan mal hasoru ofendida.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, di'ak malu ona ho ofendida no promete sei la komete tan krime hanesan iha futuru, nune'e tribunál konklui prosesu ne'e no kondena arguidu ho pena multa US\$75.00 ne'ebé arguidu sei selu 0,50 sentavus kada loron durante loron 150. Tribunál mós fiksa pena alternativa durante loron 30 prizaun, bainhira arguidu la kumpri pena multa refere.

6. Krime ofensa ba integridade física simples ho natureza violéncia doméstika

Nú. Prosesu : 0060/23.LIBZT
Kompozisaun Tribunál : Singulár
Juisa : Dra. Ana Pula Fonseca
Prokuradór : Dr. Napolião Soares da Silva
Defeza : Dr. Marçal Mascarinhas
Desizaun : Pena multa US\$45.00

Iha 13 Dezembru 2024, Tribunál Judisiál Primeira Instánsia Dili, prezide prezide julgamentu leitura sentensa ba krime ofensa ba integridade fizika simpes ho natureza VD ne'ebé envolve arguidu JdS hasoru nia feen, iha Munisípiu Likisá.

Akuzasaun Prokuradór

Prokuradór akuza kata iha 17 Agostu 2023, iha oras tuku 20:30 kalan, arguidu tuku dala rua iha ofendida nia hasan, dala rua iha ulun, tebe dala rua iha ofendida nia kotuk laran no tuku dala rua iha ofendida nia kabun. Arguidu nia aktu ne'e rezulta ofendida sente moras maka'as iha parte hasan, ulun, kotuk laran no kabun no konsege ba halo tratamentu iha Sentro Saúde Likisá.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa parsialmente ba faktu sira iha akuzasaun no deklarata katak la tuku iha arguidu nia ulun, maibe tuku de'it iha kotuk laran, basa dala ida iha hasan no la tuku iha ofendida nia kabun. Arguidu mós deklarata katak foin primeiravés mai hatan iha tribunál, arrepende ninia hahalok no deklarata katak hafoin akontesementu ne'e sira diak malu kedas no husu ona deskulpa ba ofendida.

Iha parte seluk, ofendida konfirma faktu hotu iha akuzasaun no komfirma mós deklarasaun arguidu nian kona-ba di'ak malu ona no kontinua moris hamutuk hanesan feen ho la'en.

Alegasaun finál

Prokuradór konsidera arguidu provadu komete krime hasoru ofendida konfisaun parsial hosi arguidu no konfirmasaun hosi ofendida, atu halo prevensaun atu arguidu la komete tan iha futuru husu ba tribunál atu kondena arguidu ho pena multa.

Alende ne'e, defeza konkorda ho alegasaun prokuradór nian atu kondena arguidu ho pena multa, maibé pena multa refere tuir kapasidade arguidu nian.

Desizaun

Depoizde avalia faktu sira hotu tribunál prova katak faktu hotu iha akuzasaun prokuradór nian provadu no konsidera katak arguidu nia aktu ne'e rezulta ka lori konsekuensia ba saude fizika ofendida hanesan sente moras maka'as iha hasan, ulun, kotuk laran no kabun.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé asosia ho krime ne'e, tribunál konklui prosesu ne'e no kondena arguidu ho pena multa US\$45.00, ne'ebé arguidu sei selu 0,50 sentavus, durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

7. Krime ofensa ba integridade física simples ho natureza violénsia doméstika

Nú. Prosesu	: 0649/23 DICMR
Kompozisaun Tribunál	: Singulár
Juiza	: Dra. Ana Paula Fonseca
Prokuradór	: Dr. Napolião Soares da Silva
Defeza	: Dr. Marçal Mascarinhas
Desizaun	: Pena multa US\$45.00

Iha 13 Dezembru 2024, Tribunál Judisiál Primeira Instánsia Dili, prezide prezide julgamentu leitura sentensa ba krime ofensa ba integridade fizika simpes natureza VD ne'ebé envolve arguidu JMP hasoru nia feen, iha Munisípiu Dili.

Akuzasaun Prokuradór

Prokuradór akuza kata, iha 1 Setembru 2023, iha oras tuku 20:00 kalan, arguidu tuku dala ida ho maka'as iha ofendida nia inus rezulta raan sai barak, bubu no metan.

Produsaun ba prova sira

Iha prosesu julgamentu, arguidu konfesa parsialmente ba faktu sira iha akuzasaun no deklara katak nia la tuku ofendida nia inus, maibe bainhira arguidu hiit nia liman maka arguidu nia liman kona ofendida nia inus no rezulta halo raan. Arguidu deklara katak foin primeiravés mai hatan iha tribunál, arrepende ninia hahalok no hafoin akontesementu ne'e, arguidu husu kedas deskulpa ba ofendida no sira di'ak malu fali ona.

Iha parte seluk, ofendida konfirma faktu hotu iha akuzasaun no deklara katak di'ak malu ona ho arguidu no kontinua moris hamutuk hanesan feen ho la'en.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3 (a), 35 (b) no 36 LKVD.

Alegasaun finál

Prokuradór konsidera arguidu provadu komete krime hasoru ofendida. Mezmu iha produsaun prova arguidu konfesa parsialmente ba faktu iha akuzasaun, maibe ofendida konfirma faktu hotu iha akuzasaun, tanba ne'e husu ba tribunál atu kondena arguidu ho pena multa.

Alende ne'e, defeza konkorda ho alegasaun prokuradór nian atu kondena arguidu ho pena multa, maibe pena multa refere tuir kapasidade arguidu nian.

Desizaun

Depoizde avalia faktu sira hotu tribunál prova katak akuzasaun prokuradór nian provadu. Tribunál mós konsidera katak konsekuensia hosi arguidu nia agresaun ne'e, halo ofendida nia inus raan sai barak.

Bazeia ba faktu provadu sira no tetu mós sirkunstánsia hotu-hotu ne'ebe haleu krime ne'e, tribunál konklui prosesu ne'e no kondena arguidu ho pena multa US\$45.00, ne'ebé arguidu sei selu 0,50 sentavus kada loraun, durante loraun 90. Tribunál mós fiksa pena alternativa durante loraun 60 prizaun, bainhira arguidu la kumpri pena multa refere.

8. Krime Raptu

Nú. Prosesu	: 0123/23. DIBCR
Kompozisaun Tribunál Juis	: Koletivu : Dra. Francisca Cabral, Dr. Afonso Carmona no Dr. José Escurial
Prokuradór	: Dr. Osorio de Deus
Defeza	: Dr. Juvinal Yanes Freitas
Desizaun	: Absolve

Iha 19 Dezembru 2024, Tribunál Judisiál Primeira Instánsia Dili, prezide leitura sentesa ba krime raptu ne'ebé envolve arguidu TX hasoru ofendida JF, iha Munisípiu Dili.

Akuzasaun Prokuradór

Prokuradór akuza katak iha 13 Abril 2023, ofendida *inbox* liuhosi WA hodi husu arguidu iha ne'ebé no arguidu hatan katak iha hela Manatuto no arguidu mós husu ofendida katak "ba Manatuto ka lae? se ba arguidu atu tula". Tanba ne'e ofendida hatan katak "bele mai tula ofendida no arguidu hosi Manatuto ho motorizada mai tula ofendida iha Dili no sira na'in rua ba Manatuto. Maibe bainhira to'o iha área Fatumeta-Metinaro nian, arguidu hateten ba ofendida katak "*mina hela oituan de'it ona*", nune'e ofendida dehan ba arguidu atu sira fila de'it ona tanba rai mós kalan ona, nune'e arguidu volta motor, arguidu ho ofendida fila fali mai Dili. Tuir dalan arguidu hateten ba ofendida katak "*di'ak liu ita rua ba hakmatek iha Sartutu, Dolok oan-Cristu Rei nia kotuk*", maibe ofendida *nonook deit*. Bainhira to'o iha Metinaro, ofendida fó osan US\$2.00 ba arguidu atu ense gasolina ba motor, maibe arguidu la kohi no halai liu de'it.

Bainhira to'o iha ofendida nia bin sira nia uma (*besik rotunda Hera nian*), ofendida fó hatene ba arguidu atu ofendida tun iha ne'eba, maibe arguidu la para, no kontinua halai ho velocidade maka'as dirasaun Sartutu Dolok oan

nian. Tanba ne'e ofendida dehan ba arguidu "*ó lori fali hau atu ba ne'ebé mak ne'e, di'ak liu ó para tiha motor hau tun agora, se ó la para, hau haksoit de'it ona*". Maibé arguidu la preokupa no kontinua gas motor halai liu ba dresaun dolok oan. Tanba ta'uk ofendida haksoit tun hosi motor hodi monu ba rai baku reen-toos ba iha rai, rezulta kanek no nakles iha reen-toos, bubu no kanek iha matan, tilun, ibun, inus no kanotak parte karuk metan hotu. Bainhira ofendida monu tiha ona iha rai mak arguidu foin para motor hodi hakbesik ba kaer ofendida nia liman no hateten ba ofendida katak "*ó hanesan fali hau atu het ó*", arguidu komesa ta'uk hodi tula fali ofendida ba nia bin sira nia uma. Hafoin hatun ofendida, arguidu fila kedas ba nia uma. Ofendida ba halo tratamentu iha Ospital Nasionál Guidu Valadares no liu semana rua mak ofendida nia kanek sira ne'e foin di'ak.

Prokurador akuza arguidu kontra artigu 161 (1) KP kona-ba krime raptu ho moldura penal tinan 4 to'o tinan 12.

Produsaun ba prova sira

Iha prosesu julgamentu, arguidu hili direitu nonook. Entretantu ofendida deklarata katak hafoin akontesimentu ne'e sira rezolve ona problema ne'e tuir familia.

Alegasaun final

Prokurador haktuir katak arguidu hili direitu nonook mezmu nune'e ofendida konfirma faktu hotu iha akuzasaun no deklarata katak depoisde akontesimentu, ne'e rezolve ona tuir familia, nune'e prokurador husu ba tribunál atu haree no tetu sirkunstansia hotu-hotu ne'ebé iha hodi decide tuir konviksaun tribunál nian.

Entretantu, defeza haktuir katak bazeia ba ofendida nia deklarasaun iha inisiu sira na'in rua konkorda malu mak arguidu ba tula ofendida. Nune'e mós bainhira sira decide fila-fali mós arguidu tula ofendida liuhosi estrada la'os ailaran, ofendida rasik mak haksoit tun hosi motor leten tanba ne'e husu ba tribunál atu halo alterasaun hosi krime ofensa ba integridade fizika simples no husu ba tribunál atu aplika pena ne'ebé kmaan no justu ba arguidu.

Desizaun

Depoisde avalia faktu hotu, tribunál prova katak arguidu hosi Manatuto tula ofendida iha Hera tanba sira nain rua konkorda malu, ofendida monu tanba ofendida mak haksoit tun hosi motor leten la'os arguidu mak halo nia monu no la'os arguidu mak obriga ofendida atu halo buat ruma.

Bazeia ba faktu sira ne'e hotu no tetu mós ho sirkunstansia hotu-hotu ne'ebé haleu krime ne'e, nune'e tribunál konklui prosesu ne'e no absolve arguidu hosi krime ne'e.

Atu hetan informasaun kompletu favor kontaktu:

Ana Paula Marçal
Diretora Ezekutiva JSMP
Email: ana@jsmp.tl
Telefóne: 332388377040735
Website: <http://jsmp.tl>